

Орман 17 рет өртке оранды  
3-бет



Түркі сазын түгендеген...  
6-бет



Тәттімбет есімі Түркияда ұлықталды  
8-бет



ҚАЗДАУЫСТЫ ҚАЗЫБЕК БИ: СӨЗДІҢ АТАСЫ – БІРЛІК, АНАСЫ – ШЫНДЫҚ

# ORTALYQ QAZAQSTAN

Қ А Р А Ф А Н Д Ы О Б Л Ы С Т Ы Қ Қ О Ф А М Д Ы Қ - С А Я С И Г А З Е Т І

www.ortalyq.kz

www.instagram.com/ortalyq.kz/

БЕЙСЕНБІ, 7 ҚЫРКҮЙЕК, 2023 ЖЫЛ №99 (23 275)

www.facebook.com/ortalyq.kz/

info@ortalyq.kz

## • МӘСЕЛЕНІҢ МӘНІСІ

# Оқушылар неше күн оқиды?

Қарағанды облысының мектептерінде биыл 6 күндік оқу кестесі енгізілді. Мұндай шешім жоғары сынып оқушыларына өткізілетін сабақтардың көптігіне байланысты қабылданған. Өткен оқу жылында оқушылар мектептен кешкі сағат 21:00-де қайтқан кездері болыпты. Биылғы оқу жылында ата-аналар тарапынан шағым көп түскен соң 5 күндік оқу кестесін 6 күнге бөлуге рұқсат берілген.



Гүлнұр СЕРІКЖАНҚЫЗЫ, «Ortalyq Qazaqstan»

Қарағанды облысының білім басқармасы өңір мектептерінде 6 күндік оқу кестесінің енгізілуі себепін түсіндірді.

«Қолданыстағы санитарлық-эпидемиологиялық талаптарға сәйкес бірінші және екінші ауысымдағы сабақтар арасындағы үзілістердің ең аз уақыт лимиті бекітілді. Кестеге байланысты сабақты 08:00-де бастайтын мектептерде бірінші ауысымдағы сабақтар сағат 14.05-те (7 сабақ) аяқталатын. Екінші ауысым сағат 14:45-те басталатын сабақтар кешкі сағат 20:50-де (7 сабақ) аяқталды. Өткен жылы екінші ауысымда білім алатын оқушылардың ата-аналар қауымы сабақтардың тым кеш, қыс кезінде, тіпті, қараңғыда аяқталатынына наразылық білдірді. Осы себепті 7, 8, 9, 10 және 11 сынып оқушыларының сабақтарын 6 күнге бөлу туралы шешім қабылданды. Осылайша күн сайын өтетін сабақтар саны 6-ға дейін қысқарады, ал сенбі күндері тек 4 сабақ болады», – делінген хабарламада.

Айта кетейік, мұндай шешімнің 7 сыныптан төмен сыныптарға қатысы жоқ. Өйткені, олардың жүктемесі 30 сағаттан аспайды. Сондай-ақ, 5 күндік оқу ережесі бір ауысымда білім алатын мектептерде де қалдырылды.

## • МАРАПАТ

# Тіл жанашырлары төрге озды

Кеншілер астанасында Қазақстан халқы тілдері күні мерекесіне орай жыл сайын дәстүрге айналған Қарағанды облысы әкімінің «Тіл жанашыры» сыйлығын табыстау салтанаты өтті. Аталған сыйлық сегіз номинация бойынша анықталған жеңімпаздарға табысталды.

Гүлнұр СЕРІКЖАНҚЫЗЫ, «Ortalyq Qazaqstan»

Қарағанды облысы әкімінің «Тіл жанашыры» сыйлығы Қазақстан халқы тілдері күні мерекесіне орай мемлекеттік тілдің қоғамдық ролі мен маңызын арттыру, тілдерді дамытуға, мемлекеттік тіл саясатын жүзеге асыруға үлес қосқан тұлғаларды ынталандыру және оларға қолдау көрсету мақсатында 2012 жылдан беріліп келеді. Осы уақыт аралығында 400-ден астам адам қатысып, қызмет саласында тілге жанашырлығын танытқан озаттар марапатталды. Биыл «Тіл жанашыры» сыйлығының лауреаттарын іріктеу жөніндегі комиссия 8 номинация бойынша қатысуға ниет білдірген 35 адамның жұмысын қараған.

Салтанатты шарада Қарағанды облысы әкімінің орынбасары Бауыржан Асанов құттықтау сөз сөйледі.

– Бұл мереке – еліміз үшін маңызды. Мемлекет басшысы Қасым-Жомарт Тоқаев: «Халқымыздың тарихы да, тағдыры да – тілінде. Тіл өткен тарихпен ғана емес, бүгін мен болашақты байланыстыратын маңызды құрал», – деп атап айтты. Елімізде барлық этнос өкілдерінің ана тілін дамытуға барынша жағдай жасалып келеді. Оның ішінде мемлекеттік тілді қолдану аясын кеңей-



ту шаралары жүйелі. Мемлекеттік тілге деген сұраныс жоғары. Заман талабына сай тіл оқыту жұмыстары, жаңа технология, үздік әдістемелермен жетілдірілді. Аймақта қазақ тілінде тәлім-тәрбие, білім беретін балабақшалар мен мектептердің саны жыл сайын артуда. Тіл саясатын іске асыру бағытында атқарылып жатқан жұмыстар мен жетістіктерге облысымыздағы тіл жанашырларының да қосар үлесі мол, – дей келе, облыс әкімінің орынбасары Бауыржан Қоңырбайұлы мереке күні өңіріміздегі тіл саясатын жүзеге асыруда, мемлекеттік тілдің қолдану аясын кеңейтуге зор үлес қосып, айрықша еңбек етіп жүрген азаматтарға алғыс білдірді.

Сондай-ақ, облыс әкімінің орынбасары «Тіл жанашыры» сыйлығының ең басты жұлдесі «Тіл майталманы» номинациясының лауреатына марапат табыстады. Бас жұлде Қазақ тілі оқытушыларының халықаралық бірлестігінің мүшесі, Қарағанды облыстық тілдерді оқыту орталығының директоры Алмагүл Игеноваға берілді. Марапат иесіне «Тіл жанашыры» сыйлығының мүсіні, арнайы диплом және 1 млн. теңге көлемінде ақшалай сыйлық табыс етілді.

«Мемлекеттік тіл – бизнесте» номинациясы бойынша «Тіл жанашыры» сыйлығы BioHumus ғылыми білім беру орталығының жетекшісі, жаратылыстану ғылымдарының магистрі, PhD доктор Аралым Серікбайға табысталды.

► 2-бет

## • ӨЗЕКТІ

# Бетеге кетіп, бел қалды

Биыл аймақ жазы жауынсыз өтті. Бір айлық жауын жаз соңында жауып, қала қауымын әбiрге салса да, ауылдағы ағайынды қарық қылмады. Себебі, жауын болмаса, жерге қылтаңақ шықпасы хақ. Шабұға шөп таппай, өзге өңірден жаншылған жоңышқа алдыруға мәжбүр жұрттың жағдайы маз емес. Оңтүстікте орта есеппен бір бума жоңышқа – 1500-1600 теңге. Ал, бір үйдің 40-50 қой-ешкі, 15-20 сиыры мен 7-8 жылқысына кемінде 150-200 бума жоңышқадан есептелсе, 200-300 мың теңгеге шығады. Қалта қағар қаражат. Тұмысынан алабота мен боз, қалаберді жусан мен қияқ қана татқан Арқа малына бірінші-екінші орынның көк жоңышқасы майлы болатыны бар. Олар оған үйренгенше сіңіре де алмайды. Спыр сүтінің дәмі өзгеріп, тіпті, шамадан тыс көп жеген малдың кеудесін алып, ауыруы да ғажап емес. Бұл – Арқаның жылдағы көк қияғы, бозды-бетегесі аралас көк майсасының жоқтығының әсері. Дәнді дақылдардың да барар жері осы. Мәселе – облыс басшылығының назарынан тыс қалды дей алмаймыз. Бұған дейінгі өткен бірқатар жиындарда облыс әкімі Ермағанбет Бөлекпаев қысқа дайындық, оның ішінде, мал азығының жетіспеушілігін де баса назарға алған болатын.

Жан АМАНТАЙ, «Ortalyq Qazaqstan»

Облыс бойынша биыл 994 мың гектар жерден 940,4 мың тонна көлемінде астық жиналуы керек. Оның 813,4 мың гектары бидай, 160,4 мың гектары арпа, ал, 13,7 мыңға жуық гектары сұлы.

Аймақта қыстауға түсер мал басы – 458 мың ірі қара, 696 мың қой-ешкі, 312 мың жылқы екен.

Осынша малды Арқаның ақшұнақ аязынан шашаусыз шығару үшін 1,9 млн. тонна жем-шөп қажеттігі бар.

► 4-бет



## • БӘРЕКЕЛДІ!

# Айсұлтан абырой биігінде

Әріптесіміз, «LIFE 09» ақпарат агенттігі бас редакторының орынбасары Айсұлтан Жақып облыс әкімінің «Тіл жанашыры» сыйлығының «Тіл жаршысы» аталымын жеңіп алып, медиа-холдингтің мерейін тасытты.

Жәлел ШАЛҚАР, «Ortalyq Qazaqstan»

Айсұлтан Мұхамедияұлы көп жылдан бері жемісті еңбек етіп келе жатқан танымал журналист, блогер. Әлеуметтік желіде 54 мың оқырманы бар оның «Кейіпкер», «Бес сөз» сынды жобалары елдің қолдауы мен ыстық ықыласына ие болған. Айсұлтан мемлекеттік тілдің мәртебесін көтеру жолында әлі де аянбай тер төгетініне сенеміз.



## • 10 ҚЫРКҮЙЕК – ОТБАСЫ КҮНІ

# «Қоғам – тірі ағза»

Отбасы, ошақ қасындағы әйел заты зорлық-зомбылықтан көз ашпай тұр. Қорлықты өзгеден емес, күйеуінен көреді. Ішкі істер министрлігінің берген ресми мәліметіне сүйенсек, былтыр республика бойынша тұрмыстық зорлық-зомбылық туралы 100 мың хабарлама тіркелінді. 668 қылмыс жасалған. Облысымыздағы көрсеткіш те оңай тұрған жоқ. Кейінгі 7 айдың ішінде 88 жағдай орын алған. Бес әйел қаза болып, он бірін өз-өзіне қол жұмсауға дейін жеткізген. Он төртінші денсаулығына ауыр зақым келген. Қоғамның бұл індетіне Президент Қасым-Жомарт Тоқаев та назар аударды. «Статистика көңіл көншітпейді. Соңғы екі жарым жылда үйдегі зорлық-зомбылықтың салдарынан 300 адам көз жұмды. Денсаулыққа ауыр зиян келтірудің 878 фактісі және орташа зиян келтірудің 808 фактісі тіркелген. Осындай құқықбұзушылықтар бойынша 37 мыңнан астам адам әкімшілік жауапкершілікке тартылды», – деді Президент.

Ерік НАРЫН, «Ortalyq Qazaqstan»

Кәсіби отбасылық психолог, Е.Бөкетов атындағы Қарағанды университетінің оқытушысы Салтанат Смағұлова

нақты себептерді атап отыр. Қазір – нарықтың дәуірі. Еркегі түзге кетіп, әйелі үй бағып отыратын заман емес. Екі жақтап тыраштанбаса, болмайды. Кәсіп ашып, көп-көрім ақша тауып жүрген әйелдер қазір көп. Себебі, жауапкершілігі төмен, еңбекке құлықсыз ерлердің қоғамдағы үлесі артып келеді. Міне, сол белсенділігі төмен ер адамдар белсенді әйелдерден өз мәртебесін қызғанады екен.

– Конфликтілік жағдайдың қол көтерумен аяқталуын аналармен жеке кеңесте талдағанымызда түрлі себеп-салдар анықталды. Мысалы, материалдық жағдайдың төмендігі. Осыған байланысты аналардың жеке кәсіппен айналысуы, екі немесе одан да көп жерде жұмыс істеуі. Нәтижесінде отбасына аз уақыт бөлуі. «Жұмыс істеп, қаржы таппасак, ай сайынғы төлемдерді уағында төлей алмаймыз. Ал, жұмыспен жүріп отбасына аз уақыт бөлетіміз рас. Осыдан келіп, «уағында ас ішпейміз, осы үйге қонақ келуді қойды» деген сияқты күнкіл бірте-бірте келіспеушілікке, соңында ер адамнан таяқ жеуге дейін апарды» дейді жәбір көрген аналарымыз, – деді Салтанат Смағұлова.

► 5-бет

ВАЛЮТАЛАРДЫҢ РЕСМИ БАҒАМДАРЫ:

•EUR/KZT 494.28

•USD/KZT 459.97

•RUB/KZT 4.71

•CNY/KZT 62.98

Қазақстан Ұлттық Банкінің 6 қыркүйек, 2023 жылғы дерегі бойынша

# Тіл жанашырлары төрге озды

(Соңы. Басы 1-бетте)

«Тіл білгірі» номинациясымен мемлекеттік тілді еркін меңгерген өзге ұлт өкілі, Қ.Сәтбаев атындағы мектеп-гимназия директорының тәрбие ісі жөніндегі орынбасары, қазақ тілі пәнінің мұғалімі Ольга Тим марапатталды.

Саран қаласы тілдерді дамыту орталығының оқытушысы Динара Жүпенова «Үздік оқытушы» номинациясы бойынша «Тіл жанашыры» сыйлығының лауреаты болды.

Мемлекеттік тіл саясатының өзекті мәселелерін жүйелі әрі сапалы жариялағаны және материал беру бірегейлігі үшін берілетін сыйлықтың «Тіл жаршысы» номинациясымен әлеуметтік желіде 54 мың оқырманы бар блогер, журналист әріптесіміз Айсұлтан Жақып марапатталды.

Тіл саясатын жүзеге асыру бағытындағы өзекті мәселелерді қамтып, хабар дайындаған өңірдің бұқаралық ақпарат құралдары өкілдеріне берілетін «Үздік телехабар» номинациясы «Сағуақ» телеарнасының шеф-редакторы, танымал журналист Гүлбақша Ажахановаға бұйырды.

Ал, Шет ауданының мәдениет, тілдерді дамыту, денешынықтыру



және спорт бөлімінің бас маманы Гүлзада Махмұтова «Мемлекеттік тіл – мемлекеттік қызметте» номинациясы бойынша жеңімпаз

атанды. «Жас полиглот» номинациясында Теміртау қаласы №9 лицейінің шет тілі пәнінің мұғалімі,

І санатты педагог Данияр Жаңабәев жеңіске жетті.

Барлық жеңімпаздарға «Тіл жанашыры» сыйлығының мүсіні,

арнайы диплом және 500 мың теңге ақшалай сыйлық табысталды.

Қарағанды облысы әкімінің «Тіл жанашыры» сыйлығының

ең басты жүлдесі – «Тіл майталманы» номинациясының лауреаты атанған Алмагүл Игенова өз әсерімен бөлісті.

– Еңбектің бааланғаны қуаныш, әрине. Бұл, ең алдымен, жауапкершілік. Осы жеңіс менің ғана емес, әріптестерімнің де жеңісі. Өйткені біз үлкен жобаларды әріптестерімізбен бірге жасаймыз. Осы байқауға соңғы үш жылда жарық көрген еңбектерімізді, жетістіктерімізді ұсындық. Бағдарламасы Жоғары сотта мақұлданған сот саласының қызметкерлеріне арналған 3 деңгейлік оқу-әдістемелік кешенін жасадық, аудиокұралымен бірге. Республика бойынша барлық сот жүйесінде біз шығарған оқу құралымен оқытады. Сондай-ақ, Қарағанды облысында ғана бар өзіндік баламасы жоқ жобалар жасалды. Сауда, медицина, банк, нотариат саласына арналған оқу құралдары жарық көрді. Тіл комитетінің сараптама-сынан өткен біз дайындаған оқу құралдары республика бойынша мың данамен тегін шығарылды. Оқу құралдарының веб-нұсқасы бар. Қазірдің өзінде үлкен жобалар қолға алынды, – деді облыстық тілдерді оқыту орталығының директоры Алмагүл Игенова.

Суреттерді түсірген Жангелді ӘБДІҒАЛЫМ

## • ӘЛЕУМЕТТІК ҚОЛДАУ

### Қаржылай көмек көрсетілді

Приозерск қаласының әкімдігі әлеуметтік мақсаттағы жобаларды жүзеге асырып келеді. Мұқтаж жандарға кедергісіз келешек қалыптастырып, қоғам өміріне белсене араласуына ықпал ету үшін жасалып жатқан жұмыстар аз емес. Қалада арнайы комиссия құрылып, әлеуметтік жағдайы төмен отбасылардың тұрмысымен танысқан. Халықты әлеуметтік қорғау жүйесін жандандыру үшін шаһарда шартты ақшалай көмек ұсыну бойынша жұмыстар жүргізілуде. Бұл туралы Приозерск қаласының жұмыспен қамту және әлеуметтік бағдарламалар бөлімінің басшысы Ұлан Алмас мәлімдеді.

Нұрдос КӘРІМ, «Ortalyq Qazaqstan»

Приозерск қаласында әлеуметтік көмек көрсетудің, оның мөлшерлерін белгілеудің және мұқтаж азаматтардың жекелеген санаттарының тізбесін айқындау қағидасы негізінде біржолғы материалдық көмек көрсетіледі. Әлеуметтік көмектің шекті шамасы Қазақстан Республикасының заңнамасына сәйкес күнтізбелік жылға бекітілген 55 айлық

материалдық көмек көрсетілді, – дейді Ұлан Алмас.

Бөлім басшысының айтуынша, атаулы күндер мен мереке күндеріне орай, Ауғанстан соғысының жеті ардагеріне – 200 мың теңгеден, әлеуметтік маңызы бар 65 науқасқа, 470 көпбалалы анаға 5 мың теңгеден, тәжік-ауған шекарасында әскери қақтығыстарға қатысқан бес әскери қызметшіге, Ирактағы бітімгершілік операцияларға қатысқан бір әске-



есептік көрсеткіш мөлшерінде. Жыл басынан бері өмірлік қиын жағдайға тап болған 77 адамға, яғни, әлеуметтік маңызы бар аурулармен ауыратын 50 адам, бірінші, екінші, үшінші топтағы мүгедектігі бар 11 адам, бас бостандығынан айыру орындарынан шығып келген 2 адам, өрттің салдарынан зардап шеккен 2 адам, көпбалалы 4 отбасы және аз қамтылған 8 отбасыға тамақтануға және емделуге жалпы сомасы 7 млн.127 мың теңге көлемінде біржолғы

ри қызметшіге, Чернобыль АЭС-індегі апаттың зардаптарын жоюға қатысқан бір адамға 200 мың теңгеден және Ұлы Отан соғысының мүгедектеріне теңестірілген бір адамға 100 мың теңгеден, бес жыл еңбеккеріне 30 мың теңгеден, 18 жасқа дейінгі 31 мүгедектігі бар балаларға 5 мың теңгеден жалпы сомасы 6 млн. 30 мың теңге көлемінде материалдық көмек берілген.

ПРИОЗЕРСК

## • САЛТАНАТ

### Түрі бөлек, тілегі бір

Қазақстан халқының тілдері күні Саран қаласының Мәдениет үйінде мерекелік шара ұйымдастырылып, аталған өңірді мекендейтін 70-тен аса ұлт өкілінің тілдері төрге озды.

Ержан ИМАШ, «Ortalyq Qazaqstan»

Мәдениет үйіне кіреберісте екі қатар тізілген түрлі ұлт киіміндегі жастар келушілерді қошеметпен қарсы алып, қақ жарыла жол ашып тұрды. Олар қаладағы Тілдерді дамыту орталығының мамандары-

ның шеберлік сағаттарын тамашалап, одан әрі залға өтіп, мерекелік салтанатқа куә болды.

Салтанатты сәтте сахна төріне шыққан Саран қаласы әкімінің орынбасары Еркін Баулықов жиналған жұртты мерекемен құттықтап, қалада тілдерді дамыту ісіне қосқан үлесі үшін бір топ

азаматқа қала әкімінің Алғыс хаттарын тапсырды. Марапат алғандардың арасында қалалық Аналар кеңесінің төрағасы, «Тіл қорғаны» жұмыс тобының мүшесі Гүлжан Жүсіпбекова, Балалар өнер мектебі домбыра сыныбының мұғалімі Габиден Абжатов, Халықаралық «Қазақ тілі» қоға-

## Қарағанды – чемпиондар ұстаханасы



ҚАРАҒАНДЫ ОБЛАСЫНЫҢ ӘКІМДІГІ

Биыл Ұлттық Олимпиадалық комитеттің 30 жылдығы. Осыған орай комитеттің бас директоры Серік Қасқабасов Қарағандыға арнайы келді. Облыс әкімдігінде жиын ұйымдастырылып, оған өңірімізден шыққан Олимпиада ойындарының және Әлем чемпионаттарының жеңімпаздары мен жүлдегерлері, еңбек сіңірген бапкерлер қатысты. Жиын барысында комитеттің атқарған жұмыстары айтылып, спорт сандақтарына мерейтойлық төсбелгілер, Алғыс хаттар табысталды.

Ерік НАРЫН, «Ortalyq Qazaqstan»

Облыс әкімінің орынбасары Бауыржан Асанов аймаққа арнайы келген Ұлттық Олимпиадалық комитет ұйымына ризашылығын білдірді. Бұдан соң Ұлттық Олимпиадалық комитеттің бас директоры Серік Қасқабасов баяндама жасады. Құрметті мейманның сөзінше, әлемдік спорт аренасында Қазақстанның беделі жоғары. Жаһан пікірімізбен санасады.

– Бүгінде Халықаралық Олимпиада комитеті біздің ұлттық құраманы мойындап, құрметпен қарайды. 30 жыл ішінде еліміздің тарландары талай биікті бағындырды, жарыс алаңында талай дүлдүлді тізе бүктірді. Кез келген бәсекеге қабілеттіміз. Мұның бәрі жүйелі жұмыстың, қажырлы еңбектің арқасы екені сөзсіз. Осында отырған әр спортшы, әр бапкер ел беделін көтеруде аянбай тер төкті. Қарағанды – чемпиондарды шығаратын ұстахана секілді. Осы өңірден үздік спортшылар топ-тобымен қанат қақты. Мысалы, Василий Жиров, Геннадий Головкин, Серік Сәпиев, Серік Елеуов, Максим Раков, Дмитрий Карпов секілді данқты спортшылар бар. Бұлардың барлығы да өз таланттарымен әлемді жалт қаратқан дарындар. Осы спортшылардың еңбегімен Қазақстан әлемдік олимпиада қозғалысының белді өкіліне айналды, – деді Ұлттық Олимпиадалық комитеттің бас директоры.

Салтанатты жиынға келген құрметті меймандардың қатарында Лондон Олимпиадасының чемпионы, «Вэл Баркер» кубогінің иегері Серік Сәпиевтің бапкері Александр Стрельников бар. Данқты боксшымыздың бапкері бүгінде Абай қаласында балаларға қолғап түйістірудің әліппесін үйретіп жүр екен. «Әлі де қы-



руар жұмыстар атқаруға шамам жетеді» дейді. Ол Қарағанды бокс мектебінің бүгінгі ахуалына баға берді.

– Қарағанды бокс мектебінің ел аумағында беделі зор. Өңірімізден талай талант қанат қаққанын бокс жанкүйерлері жақсы біледі. Бүгінгі жас буында да дарынды боксшылар баршылық. Соларға үміт артып отырмыз. Өңірдің ғана емес, әлемдік деңгейдегі додаларда ел байрағын желбіретуге күші мен қабілеті жететін жастар өсіп келеді. Өз көзіммен көріп жүрмін. Баптаған сұңқарларымыздың бірі – Абылайхан Жүсіпов.

– Бокста биікке көтерілу оңай емес. Әлемнің түпкір-түпкірінен мықты спортшылар шығып жатыр. Чемпион болу үшін қажырлы еңбек керек. Ауыр бейнет десе де болады. Жерлестерімізге тек сәттілік тілейміз, – деді Александр Стрельников.

Дзюдошы, Қазақстанның еңбек сіңірген спорт шебері, Әлем чемпионы Мак-

сим Раков спорттық мансабын аяқтаған. Қазір жас спортшыларға бапкер болып, өзінің құнды тәжірибесімен бөлісіп жүр екен.

– Қазір жас спортшыларға бапкермін. Менің тәжірибем оларға ауадай қажет деп

есептеймін. Еліміздің абыройын көтеріп, байрағын желбірететін спортшыларды даярлау – қазіргі мақсатым. Ел үшін тер төгу керек. Бүгінгі салтанатты жиынға қатысқанымға қуаныштымын. Арқадан шыққан данқты спортшылар мен бапкерлердің жартысынан көбі осында. Оларға басымды иіп, алғыс айтамын, – деді Максим Раков.

Қарағанды бокс мектебін Василий Жиров пен Геннадий Головкиннен кейін әлемге танытқан Серік Сәпиев те сөз алып, қатысушыларды құттықтады.

– Ел спортшылары осы уақытқа дейін жеті қысқы, сегіз жазғы ойындарға қатысыпты. Қоржынымыз медальдарға толды. Осы жетістікке масайып, босаңсуға болмайды. Алдымызда талай белес бар, – деді Серік Сәпиев.

Суретті түсірген Жангелді ӘБДІҒАЛЫМ



мы Саран қалалық бөлімшесінің төрағасы Береке Жарылғапова және басқалар бар.

Ендігі кезекте сарандықтар Қали Байжанов атындағы облыстық концерттік бірлестіктің «Мерей» ансамблі әншілерінің өнеріне тәнті болып, сүйсіне қол соқты. Әсіресе, ансамбль құрамындағы жігіттер триосы, әншілер Ербол Алшынбаев, Қуат Дүйсенов, Гүлмира Серікова, Әсем Қарабаева, Кристина Рақшаның әр тілде шырқаған әндері құлақ құрышын қандырып, жұртшылыққа қуаныш сыйлады.

САРАН











